



程
集
十

卷
集
十

齋

道光丙午春刊
門人何紹基篆

啟者此編僅據子儀孝廉見
付之本粗為排次原本移寫
既頗艸率倉卒付彫體例亦
未盡一伏覲



海內與侍郎交舊讀此集有
校出遺篇缺題謠字者不惜
郵函相告

或寄示祁淳甫尚書
何子貞太史皆可

以備

重事釐定俾成足本無任跂
切之至

平定張穆謹啟

道光二十五年十二月刻工竟
版存登喜齋

程侍郎遺集初編序

先大父宰歙徧交其邑之名儒而戶部侍郎春海程公
之考蘭翹學士以僮子從父後肄業斗山亭特爲大父
賞拔學士家極寒大父召入署躬督教之衣食視諸子
不數年諸經注疏皆精熟爲文灌辟精粹試必冠曹舉
乾隆丁酉拔貢入成均連掇巍科倬直

內廷聲望斐然顧艱於嗣晚乃誕公公丰儀玉暎父母
珍若連城七歲就傅每日讀書不過二時而寒燠晦霾
氣候失和皆輟課曹顧厓少宰大父庚寅分校南闈所
得士也時官侍講先君子從之遊與學士同邸每抱持

公問以書不能答，則徧檢輿僻不經之字相詰難。蓋好奇不羣，幼性爾也。比學士卒於山東學政任所。

高宗純皇帝特簡歙人之官清要者，俾往經紀其喪。因以少宰嗣司校事。少宰延先君子同往，至則爲庀其行篋，握公手送之登車。年十有一矣，已而先君子會試入都，見學士舊僕，訊以門戶近況，則言公子發憤力學，入邑庠，大被宗師賞異，出應試小賦，名雋綺麗，歎爲絕倫。逮乙丑再赴禮部試，公亦偕計吏來京師，風雅淹博，輦下共推爲才子。又越七年，遂與先君子同舉進士，入翰林。公嘗贈穆詩曰：君祖授我嚴，獎誨若子姓。君嚴我同

譜，欣契挫其敬。蓋實錄云：公負奇氣，博觀強誦於經訓，史筴天象地輿金石書畫，王遁太乙脈經格學，莫不窮極要眇，究析發皇之，而精神所到，卓絕岸異，必然可傳於後者，則其有韻詩文也。詩初好溫李，年長學厚，則昌黎山谷兼有其勝。又際會清宴，無金革流離之事，傷其耳目，故形之篇詠者，率排冝妥帖，力健聲宏，琅琅乎若鸞鳳之嘯於穹霄也。穆於癸巳之春，初侍公直園，情好之洽，久愈摯，不三五日，必召過飲，投巾振袂，談議交錯，寒士之被禮者，殆無與比。嘗請公自訂其詩，公曰：吾詩險而未夷，能飛揚而不能黯淡，思力所及者，腕每苦其

不隨更讀書十年殆可相質邪嗚呼孰意所業之遂止於斯歟丁酉夏穆將歸應鄉試行有日矣公置酒相餞漏過午拳拳不放別乃穆甫出都門公遽感暑疾久不瘳祁淳父尙書日往省之沈頓之頃尙以穆試事爲念遺言乞儀徵相國銘其墓而尙書書之次年穆將南游迂道入京師哭公公子德威以遺稿相授塗乙潦艸首尾多不完或篇題殘掇乙酉以前之作竟無一字存疑公尙有清本藏之別笥德威未檢獲也謀更事搜采成完秩荏苒未遑而德威又以措交庫款赴粵東卒於劉仲寅觀察署中觀察名景昌公視學貴州所拔貢生公

歿後所以賙恤其家者有加德威卒命其弟送柩返歙賈山營壙并葬公及金夫人兩世三棺其孤孫嫠婦之寄寓京師者則祁尙書爲經營擁樹之觀察又議以幼女妻德威之子而娶其女爲己子婦迎公全家入黔相依以久嗚呼師恩友誼人有同情當公賓客填咽之時詎知身後巨卿乃此兩人哉穆幼聞先君子之所以稱公者長而公之相待略如大父之待其先德知己之感永永弗諼也今年春尙書謀刻其遺集曰以此爲初編續有哀錄補梓易耳穆旣恐殘斷之稿并歸薶落又懲夫嫁名僞撰者之厚誣公也乃偕公門人何編修紹基

排比爲賦一卷、詩四卷、又凡稿艸之失題者、及詩餘試帖共爲一卷、碑志哀誄駢儷雜著之文五卷、總題曰程侍郎遺集、而敘其緣起如此、以訓公知、兼志余痛云、道光二十有五年、端蒙大荒落三月、旣望平定、張穆序

龍泉寺檢書圖記

附錄

歙縣少司農師程公旣卒之明月、儀徵相國師阮公、約同人集龍泉寺、檢其遺書、先一日、基以告於公之孤德威、德威泣而言曰、先公於辨論經史六書古義及天文地志、札記最夥、詩古文詞亦爲之甚勤、顧不自存省、其僅未散失者、襍置書篋中、往往無首尾題識、它日從容

整理、稍就次第、當乞阮公鑒定、今苦凶迫、促未遑也、顧辱公及諸君子存錄之盛心、不可以負、有戰國策地名考二十卷、遂寫粗畢矣、德威斬焉衰經、不敢躬詣、明日將浼宗人鎮北先生持正於阮公、同人旣集、鎮北持書來、公披繹久之、歎曰、疵類有未滌者、然旣博且精矣、聞尙無副墨本、余雖欲爲審訂、未忍遽攜持去、屬鎮北還於其孤、且謂曰、諸君其急爲校讐、使無遺憾、余雖老幸及爲覆眎、而弁言以行、胡朏明禹貢錐指、全謝山地理志稽疑後、此其盛業矣、並其它著作當成大集、司農其可以不朽、烏乎、京師才士之藪、魁儒碩生、究樸學、能文

章者輻湊鱗比，日至有聞。至於網羅六藝，貫弗百家，又巍然有聲名位業，使天下士歸之如星，戴斗如水，赴海在於今日，惟儀徵及司農兩公而已。然儀徵以文章經術受

三朝殊遇，敷歷封圻，入躋宰輔，儒生勳績，彪炳人寰。司農繼先公蘭翹學士後，兩世入直

書房督學典試，頻膺使命。

嚮用甫殷，迄未足以行其志。儀徵公所箸研經室集、十三經校勘記等書，手付剞劂，又刻宋本十三經注疏。

皇清經解諸巨冊，普惠天下學者。司農則詩文各種，既

未寫定，卽此二十卷成書，亦未知付棗何日。儀徵公久得末疾，日有歸志。承學之士，謂京師中儒林祭酒，繼儀徵者，惟司農。乃司農年不中壽，偶撻溼疾，遽歸道山。儀徵公年踰七旬，神明不衰，且勤勤焉檢其遺書，流連而太息之。噫，資秉之異，學術之大，精神意量，包涵斟酌之闕且遠。司農視儀徵，亦幾如驂之靳矣。信屈殊勢，豐嗇殊形，脩短異數，如其不相侔也。豈非天哉，豈非天哉。儀徵少年通籍，蚤負隆譽。由乾隆至道光六十年間，海內覃經講學之儒，皆其先後所師友，或其門下士，或其再傳弟子。司農之起後二十餘年，乾隆時老師宿儒未

及見者已多矣。然基久處京師，所及交若劉丈申甫、潘丈少白、陳丈碩士、陳秋舫、龔璉人、魏默深、陳碩甫、江鐵君、徐廉峯、管異之、陳東之、徐君青、鄭浣香、俞理初、羅茗香、汪孟慈、陳頌南、張彥惟、許印林、張石州、沈子敦、黃蓉石、諸君，大抵皆兩公所識習而矜賞者也。基自爲弟子員，出司農之門，及成進士，改庶常，儀徵公實爲館師，兩公居相鄰，基與璉人、孟慈、頌南諸君過從游侍，輒跡輒相屬。今司農已矣，儀徵旣告歸邗上，文選一樓如靈光魯殿，因念基所及交諸君者，前後數十輩，或旣逝且老，其尙未至於此者，或浮沈郎署，或留滯公車，或汎濫江湖，如有箸述，早付殺青。天時人事，茫茫汗汗，知誰爲後死，當檢其遺書者哉。讀斯圖，不禁爲吾師雪涕向天，深悲之而復幸之也。道州門人何紹基謹記。

程春海先生集序

嘉慶九年先生年二十來鄉試江寧始相見讀其詠史詩若干首先君子呼曾亮曰汝見程公子詩乎渠長汝者一歲耳及道光十一年先生來主講鍾山書院相見益親夜過其邢氏寓園月出園中竹石如沐池光盪人面坐水檻中盡讀其所作於別後者而幼聞得名以黃蝶詩及前見者俱不復存矣是時總督陶文毅公政寬簡民吏樂逸多興復湖山寺觀而葆益舟觀察尤好爲主人泛酒船至燕子磯飲絕壁下還過嘉善石壁訪梅花水夾蘿峯飯半山亭聽銅溝水聲循定林寺古道歸

以爲常。先生及曾亮數人皆其座中客也。復至京師，爲先生戶部屬官，遇我一如其舊。山館野寺，未嘗不偕。偶召賓，未嘗不與也。有所作，必見示，時命同作，然常十不副一。而先生則於詞無所窮，其稱情輔意，足以射聲叩景。如高貴者無所志而不就也。丁酉夏，忽見語曰：吾庭中樹鴉數百，夜噪而飛，拔巢去，此何祥也。未幾而病，呼余與訣。余雖悲，猶以爲倘不至若是。後十餘日，竟卒。自先生去江寧，其同游者任階、平、主、竹、嶼、注、均之皆已死，而觀察亦歸殯京師鞏駙馬之墓側。先生往哭甚哀。及余與徐蓮峯哭先生，去哭觀察時未三四年，今蓮峯又

亦久死。先生之卒已十年矣。悲夫。戶部尙書祁公以其孫幼孤，遺集或散佚，屬張石州大令編而校之。曾亮不可無一言綴於末也。先生平居無時去書，其學實事求是，而能創獲新義。阮相國何子貞編修及石州已詳言之。故惟述少長離合南北游處之歡，以見略勢分而篤古誼。如先生者，殆不可多見，以誌吾哀。至所作深博雄偉，讀者當自得之，非言詞所能贊也。雖然，先生之異乎流俗者，豈獨其詩文哉。人嘗屬曾亮以事而匿其情，漫爲請於先生，覆書曰：吾子而有是言，豈某生平有不見信於深友者乎。不然，則子受給也。其行己情深而義方

雖他事類如此傳曰直諒多聞古之益友又曰夫惟大雅卓爾不羣先生殆無愧斯言夫殆無愧斯言夫道光二十六年六月上元梅曾亮撰

誥授榮祿大夫戶部右侍郎兼管錢法堂事務春海程公墓志銘

儀徵阮元撰

壽陽祁寯藻書

公諱恩澤字雲芬號春海程氏東晉時有爲新安太守者居篁墩又遷歙南代有隱德曾祖筠祖步矩郡生員父昌期乾隆庚子進士第三人及第上書房行走翰林院侍講學士母項氏總兵樛木女公幼穎異毀齒經傳皆成誦尤好讀古書遇疑意必考問釋然而後快鄉先達曹文敏公金輔之先生皆語學士曰此子逾冠所

程侍郎遺集 墓志
學不可量矣乾隆六十年學士卒於山東學政任公甫
十一歲哀毀力學及長補學生員益博綜經史從外祖
學騎射能挽強弓最後乃從凌仲子先生遊及其闔奧
先生曰天人並至博而能精將來所成者大也嘉慶甲
子鄉試中式舉人居京師益勤於學天算地志六書訓
詁金石皆精究之辛未會試中式 殿試二甲改翰林
院庶吉士散館授編修道光元年
命在南書房行走

召諭曰汝父蘭翹先生品學朕昔年最敬汝之聲名朕
亦皆知宜更守素行今戶部侍郎祁公寓藻同

召見親聆

聖訓出語同朝皆榮之旋奉

敕校刻 養正書屋集是年充四川正主考二年補春
坊中允校刻

御製詩文初集三年放貴州學政補翰林院侍講轉侍
讀五年補春坊右庶子冬補侍講學士次年調湖南學
政回京

詔充春秋左傳纂修官補國子監祭酒九年項太夫人
卒丁憂歸歛十一年起服入京仍在 南書房行走十
二年以候補祭酒未與考差

特放廣東正主考十二月

命在上書房行走課惠親王學王敬禮師傅出于至誠講學爲詩古文書法皆日有進甚相益

上與王論公爲人有和而不同之目十三年

超擢內閣學士兼禮部侍郎冬充文淵閣直閣事十四年

授工部右侍郎兼管錢法堂十五年會試知貢舉調戶部右侍郎管錢法堂充 殿試讀卷官閏六月

諭程恩澤部務較繁著無庸在上書房行走十六年復充 殿試讀卷官十七年充

經筵講官夏受暑醫逾月病愈深遽以七月二十九日卒明日遺疏入

上嗟嘆悼惜久之

諭曰程恩澤由翰林洊升卿貳前在南書房上書房行走有年人甚謹飭辨理部務克盡厥職近因感受暑濕賞假調理方冀速就痊愈益資委任茲聞溘逝殊堪軫惜伊子程德威著加恩賞給舉人服闋後准其一體會試公學識超於時俗六藝九流皆好學深思心知其意本工篆法益熟精漢許氏文字之學官貴州學政時與布政司吳榮光勸士民育粟蠶其利大行於民又重刻

岳珂五經以訓士及奉

詔刻春秋左氏傳與祁公共議推本賈服不專守杜氏一家之學平日好士說士技若已有典試廣東期取實學之士知曾釗之名必欲得之釗久丁憂公不知也書榜大失望然所得佳士亦甚多出闈後與學海堂學長吳蘭修等遊白雲山名士會者數十人有蒲澗賞秋之圖所著述惟國策地名考二十卷已寫定本其餘多未成書實不自料其遽折詩文雄深博雅稿亦盈篋其孤方治喪待錄成卷帙就有學者擇之當成佳集公又多藏書宋元以來子史雜錄博覽強記金石書畫亦多考

訂苟有叩者必舉以應元入京與公居相近尙以暇相講習元偶校毛詩有椒其馨椒字訛本是馥字其訛久在六朝罕可相語者持以示公公獨深會其意謂詩苾芬孝祀韓詩作馥芬孝祀馥字毛韓兩見形聲不謬於六書爲加一證公又謂近人治算由九章以通四元可謂發明絕學而儀器則罕有傳者乃與鄭君復光有修復古儀器之約又嘗深究開元占經謂道光十五年木火同度當有火災人驗其言而躔之吉地案發因水之故曹文正問公古有之乎公曰水齧王季墓見棺之前和呂覽載其事所撰國策地名考如謂孟津在河北非

今孟津縣亦非古河陽縣蒲反非舜都乃衛蒲邑以嘗入秦仍歸故謂之蒲反諸條皆確不可易公之歿也年僅五十有三朝野皆悼惜之金夫人以道光元年卒二年繼娶劉夫人孫一名新寵公於元例稱門人且仲子先生爲吾友學術相契因爲之志銘曰公之爲人和而不同厓岸內峻德氣外冲兩世內廷在位靖共聲名品學守之惟公公學之大啟於凌氏約禮博文實事求是研究經義及於子史卽以其學望之於士嗚呼天命限公不祿帝諭飾終

賞延世篤遺書未定集之可讀我鐫此銘永貞宰木

程侍郎遺集初編卷一

歛程恩澤春海著

杻賦 并序

激懷園會筍齋後土阜有嘉樹三居者過者皆罔識其名予初亦曹焉繼綜其華實枝葉審諦之定為北山之杻按杻兩見詩一見周禮一見爾雅屢見山海經詩毛傳去杻櫜也即用爾雅文疏云葉侶杏而尖白色皮正赤按木皮少正赤者恐是子正赤之訛為木多曲少直枝葉茂好二月中葉疏華如棟而細蕊正白正名曰萬歲或謂之牛筋或謂之櫜材可為弓弩幹也郭注雅云侶棗細葉材中車

輞關西呼柎子一名土樞其注山海經從同同說文作

榘別有榘乃柎也

三輔黃圖曰枌詣晉宮闕名曰萬年樹

太平御覽

同皆柎也而本草經及李氏綱目不載豈以其非藥味

歟廣雅埤雅爾雅翼亦不載審此柎非難識之物自三代以來書屢見則無古今之異西都南都皆賦之則無南北之殊然自宋以後著錄漸少豈非顯隱有時人與物忽不相值耶遂作賦曰

有物於此蔭於堂背其枝羽喬而句其榮鈇析以碎曼理文身若錯繪綺而被繪畫也子有稜而方一裹一縣四核一房生青纍纍孰赤煌煌將零坼苞若蓋重囊臣

愚不識敢詢圃場或僂言於側曰此夫藹侶棟而素纖者歟葉侶杏而益鐵者歟萬歲之名聞者頌者所意欣者歟共汲之山華林之園枌詣之宮周秦漢以來所具瞻者歟或揉車輞致遠而利往或奠弓幹揚武而捍患有虬其條琅然振風有倩其景月宵瓏瓏曹一世而眇知則不相尋於斧釜外多曲而委蛇棍剛柔而積中願託根於魁父之邱想指名之洵洵故夫梓以爲羣棗以爲爻樞以爲偶聞諸北山樵者之口夫是之謂柎也

南邨耦耕圖賦

并序

鄧子湘皋與其兄子振顯鵠齊名友愛至篤子振不欲

其弟爲知縣畫聽雨圖以寄蓋取坡公慎勿苦戀高官
職詩意湘皋亦作耦耕圖以見志乃爲賦之其詞曰

客飢阻以旅餐兮干通侯而東南睠污萊而不歸兮又
輒道乎長安資媿髡而索納兮還髡徒而阻之思孟晉
以迨羣兮或差誰而取之出卽脫乎簿尉兮又奚棄乎
令長視已事以志墨兮定物遂而民向文豹欲潔其羽
毛兮宣鵠亦厲其高響安能以身之察察兮試紫水之
滄泱惆悵而私自憐兮委銀艾若泥塗吾將老於耕墾
兮吾將息乎詩書矧吾仲之清羸兮託長鑱以爲命考
豐年之瓦盆兮有倡于而無和聽天屬旣畀予有兄兮

獨奈何其舍旃前曜靈已虛擲兮後俄景其益遄累別
緒而成疾兮況家紛之化離予不從仲以歌舞兮仲日
邁其難支朝三圭而夕萬鍾兮予不以易此耽樂也丹
吾轂而覆公餗兮予又安知其以市惡也莽無垠兮天
宇倏鴛鴦兮來下仲有書兮促歸感淮雨兮資之澣圖
蒼茫兮雨浪浪書不盡言兮圖之詳季發緘以嗚噓兮
探予心而鑄辭緬舊盟於合耜兮夢已接乎東菑乞丹
青以抒懷兮聚伯亞於冷風之圻仲發緘亦當嗚噓兮
胡與予心若相期系曰季才俊兮迺慎進兮仲知命兮
季益信兮返井通兮耦兩翁兮在南邨之宮兮

六義賦居一賦

以宣德抒情炳焉三代爲韻

賦者鋪也鋪采摛文體理聯翩詩有六義二以賦詮不歌而頌釋之於元宴古詩之流解之於孟堅登高九能得其一厯樞五際含其全慮質言之無文故儷色以相宣其在唐姚之世覆燾明德頌聲並作皋夔在側無風可采無雅可飭無以比星雲無以興作息取懷而與賦之彌力周有太師六詩是序篇之異體貴乎綱文之異辭主乎緒宣聖合之延陵未能分張逸敏之通德莫能舉紀其篇什得詩人之制度導其性情悟詩人之機杼總四始而兼包恒意悅而情抒且夫方貌擬心若拒若

迎環譬託諷橫生側生興隱於比故述傳正其名比隱於賦故諸篇揭其精莫多於賦附物以切情莫顯於賦抗辭以揚聲如彼絢采喜素功之獨成如彼合樂許黃宮之特鳴附庸於詩拓疆以逞濫觴於騷導源以永其心也包宇宙而恢宏其質也轡龍虎而彪炳荀况蔚爲詞宗禮智於焉似續宋玉乖乎麗則風釣幾於斥屏研京與都主文以譎諫薦雄似如陳誼而猛省是故存周後之十家刪秦雜之九篇圭陰七子之骨江左六朝之妍其間方聞之士綴學之賢稔厯太沖之十讀過桓譚之千謝莞爾而雕蟲工形似而削鳶必其思風言泉悉

無邪之旨禽族草區補多識之編求之古人蓋亦罕焉
故夫賦之傲勸百而諷一賦之源牽兩而掣三必比類
以興物斯言腴而味醜罕譬倫品之繁則命意也銳託
志風雲之會則屬思也潭美德容於三頌紀王化於二
南大雅之音不吳不敖小雅之音如怨如愀樂心在周
得詞伯而可誦香草在楚合童蒙而共探緯以纂組飾
以鉛黛貫以明珠節以雜佩結想涉於義文託體尊於
恒岱既上薄而下該遂承流而津逮博趣於申公魯齊
探妙於韓嬰外內稽之周室攷之漢代是則擷六義之
精而傳其美愛者也

律中夾鍾賦

天杓攜卯氣自卯出三微始卯陽達陰室自下上上氣
迺遜律明堂爍朗鈎房密栗天發其聲神洩其吉受以
夾鍾能事乃畢蒼帝行德儀彼青鳳環顧四隙殊未通
洞黃宮既萌旅牙既衆奏地達物其奈凝凍承以來鍾
微氣胥貢灰飛狔殼卯氣之中圓銅范乾橋衡倒插五
一而生四九而乏以數準氣氣入我法緹室度几囿於
个夾位卯豈卯隨應而洽高高大火地歆天欲時乃種
莢菜荅孚甲祀天之宮冠以來鍾尊王首春其聲逢逢
靈府好生如天之容藩決不羸速於蟄龍周長夷則時

雨旣雨羽乃生角二間攸度羽旣動角甘澍如注木艸
以茂歲乃大穫是謂星德佐助宣布八舉三政一時畢
賦惟春之中水火更故瞻雲預知日十宮數

弓調而後求勅賦

以士愿慤而後
求智能爲韻

緬睽威之始作仰南弧而得指情性秉諸柘櫨血氣資
乎觚兕合之以九七五之規服之以上中下之士旣輕
迅而慄悍恒軫角而戾理良工憫之披曲導軌匡軫以
正淵畏不頓定大園於三尺引千鈞於一寸內通犀以
樹質外荆麋以積健穹然可藏昭然可獻勅出於調命
中以愿考之弓人厥惟成憲則有赤黑揚聲之榦青白

豐末之角筋小簡而能伸漆大和而無滯朱昔之膠旣
陳水凍之絲亦濯菑栗條其斲摯纏約侔乎疏數材美
巧和含貞抱慤被絃春和奠體冬朔故夫一石之榦環
物以垂加以戴牛二石而奇被以剽獸三石不辭燥濕
旣平宛應相隨若析斲之不均與過劑其安危則將措
其角而瞻其筋恒有力而反而若夫蹙剗之材激矢以
走體敝而句獨至無取矯無贏以致遠引無傷以洞厚
榦再液方敵角之疆筋三侔方正榦之揉若逆撓而終
繼與負弦而掣肘則雖薄其敝而長其淵勢欲前而轉
後九和之弓剛柔是求弓亦不剛手亦不柔臂與簫違

而菱解盡其綵指與把合而側骨極其適宜其動若霆
驚靜若蛇修皎若月圓張若水流昔有采翹泰岱之阿
三觀陰陽而後竭其智放矢西霜之山飲羽石梁而後
謀其利此其人皆藝成於道精留於器始於搏園終於
猛鷲蹲金甲而皆穿豈鐵室之可避故觀於繁弱鉅黍
必竹秘之所緼蘭薰雪白必忠信之所增儒者佩弦與
韋如木從繩修身弓以自警射已鵠而上升合四時於
六材收百行於九能是故以弓求之古之王弧以射求
之古之蠶蠅以士求之豈非古之顏曾哉

月中桂賦

以月裏仙人
親手植爲韻

桂花氤氳滿天闕東海聞香西海沒誰家露苑生好風
一夕珊珊入明月月旣沈兮又起桂長生兮不死刻瑤
葉兮樛枝綴黃花兮赤裏宛虹雙楯闌白肪兩階屐銀
蜍抱綺根元兔銜瓊蕊葉葉枝枝自相覆花南花北皆
秋水憶素娥於昔年渺乘鸞而上仙安二八之冰輪張
四五之明弭有金如粟有玉如煙有子如珠有露如泉
悵春妍之莫當倚秋樹而自憐秋芳不及春仙子可如
人榦弱才勝腕枝卑慣等身濃熏含鳳喙柔苔結鯉鱗
影婆娑以互締陰窅窳而相親昔聞夜夜璧輪滿今見
朝朝瓊樹新霓羽宮商月中有豔錦翻林舞垂手羌獨

立兮高寒若有人兮寡偶錯金翠兮藏明翦雲霞兮入
牖頌日月圓兮月仄桂蒼蒼兮不改色桂苑兮桂枯月
娟娟兮去雕飾人閒習見桂花黃都道天邊桂花黑孤
芳冷豔持贈誰多謝靈修日灌植

金蓮花燭賦

令狐子直當大中之時爲承旨之職翰林殊寵承旨尤
貴是時三內皆置院然宏孝以後恒御大明之宮則內
相之居必在銀臺之門矣蓮燭乍徹院吏咸驚美矣哉
後世若晁文元蘇子瞻者庶幾昉焉懿夫玉李全低桂
波初浸銀獸虛嚴金徒轉沈帝梧黹以雲布宮槐炕以

森蔭荃宰刺閨之時蘭宵視草之任斯時九微龍暝三
條鳳沁中涓無蠟紙之燒詞客罷鐙檠之吟則有寶炬
華蓮出自絳霄清禁灼象口以吹虹綵金衣而赤中肪
凝素豹玉削青蟲丹蕉外捲綠桂心通珍麩淬粉哆葉
承銅帶芍藥以腰黃倒芙蓉而掌紅夜永則房房墜露
天高則朵朵消風名曰嶽井之蓮是謂燧林之燭長明
豹尾之前雙倚螭頭之曲秉紫袖以葳蕤照青蒲而藻
縟枝枝聯鳳啄之珠寸寸警雞鳴之玉天上齊傳人間
忽引驚霆碾路飛龍接軫誅蕩闖開紆迴畱盡未聞清
蹕祇傳天敕四照璣圓當懷月吳擎出大明之南平看

宣政之北斜通史館之旁暗度宏文之側省中之池鳳
將棲門下之臺鸞已息乞聞蘭火之芬驚見秀華之飭
始知文昌與帝座聯暉太乙共長庚齊色於是彩樹轉
珠珊鞭鞞鞞環扉雙啟院鈴才動梁燕猜明宮鶯警夢
影過花迷陰移柳送暑暖冰融博虛響衆門意蕊之晨
扳耿鏤窗之務閒怯丹蛾之春瘦憐火鳳之宵還注虬
膏而濫濫雜蜃液以潏潏香屑玉皇之案寶裝才子之
山莫不珠飛細碎花拆連環銀黃兩豔荷紫雙頰碧落
則星榆白白紅牆則錦樹斑斑爾迺寶燄干霄餘光掣
電宮香在衣清露如霰燭龍迴榭木之標金雀轉觚稜
之面歷歷聞鐘沈沈閉院翦雨當窗刻詩臨硯想地炬
之盛儀偉火城之隆眷何時東壁之餘明來自南薰之
別殿

雪夜入蔡州賦

以相公新破
蔡州回爲韻

蔡爲唐心膂之疾距東都六百里而強與鎮州曹鄴兩
節度地遠而勢相望其土曠而堅其民悍而伉其用贏
子之軍其據縣壺之壯自希烈訖元濟三十年于茲官
軍未嘗抵城下而與之抗一旦愬來愬來逞胸中之甲
仗攻之于九地之下九天之上疏其山河子弟而噢休
其降將始則奪文成度興橋銜枚篝火諸將請所向繼

則東行六十里至張柴秣蓐而供張七十里至粟渚裂
裘而裹纊軍中知有常侍幾不知諸鎮與丞相矣于是
飲飛肉飛具迺梯衝亂起鴨鷺雜以雨風大雪若席揣
封太空銀虬踏波倒歎玉虹組練千百若茶若蓬三軍
之首盡白萬里之燧不紅士曰李公撫我若春融不知
有冰稜而轉覺絮蒙是不在蔡人意計之中方將酣酒
覆貂行賞錄功常侍伊何胡然入我宮方倚董重質爲
長城而一羽之書一言之諾遂解甲而來同諸鎮有勇
有怯有杜有攻方觀望巨鼇張孳設置豈知龍伯遠蹠
已釣之于滄溟之東兵刃不殷帥鼓未辭獲其元戎易

于撥麴宜傳石梁之箭宜挂扶桑之弓宜藏太室之名
宜繪陵煙之崇而夫已氏曰是役也裴公不出督師則
諸將不濟澗水之津不去中監則諸將無鬥志而甲卒
怒嗔不用韓宏爲坐鎮則王李二帥角鬚鬚而齒斷斷
烏公李公國之純臣五伐七伐一甄兩甄銀盃誓師鞞
刀告身李文通拔鋌山殷城齧光州之脣李道古出穆
陵之關克申州而薄重圍是皆戰有前死之名鋒有無
窮之新坐禡虎豹之皮飛截龍虬之鱗彼李愬者雖成
大功而實因人解之者曰客固未揣夫兵家形家之言
也夫蔡州者尙門難制韓地伊大爰有郟陂之沃鵠歌

之作棠谿之銳龍泉之磋澗水帶洄曲之阻信陽枕三關而臥申之以桂桓之險加之以熊羆之佐是故築沱口之城善戰如光顏而幾爲之挫入申州之郭奮武如道古而莫或之破蔡人一呼羣虺相和先聲之來賁育胥情然而李常侍者以一旅之師奪萬夫之旆得秀琳得李祐而後扼張柴之害斷洄曲斷朗山而後拒如林之旡恃其威信義勇激厲萃會故翹關超距之倫置死地而後生各騰驤而沛艾斯時昏昏在中觥觥在外兩不相聞皆不知何地何年而定強蔡嗟乎平淮西者度之謀也入蔡州者愬之籌也愬不得度無以分洄曲之

憂度不得愬無以操采入之矛昔阿童之渡江尙表異于石頭矧陰平之出奇實士載之鑿幽嘉常侍之良圖謂公侯其好仇故前史之文涑水之筆皆大書李愬之入蔡州若昌黎之製碑寫平淮之壯猷固當首舉裴公耆定過劉蕭規第一房謀最優然且詳述愬功諸將罕儔若夫磨日月之寶光置雕蟲之末流則騰于彼婦之口轉致貽文昌之差是不善讀韓碑者之爲之也若持此以謗愬功是何異行人之得牛故觀其沈幾英斷飛行化裁效韋虎之讓功異廉頗之牙欵士之歸也若父若兄軍之捷也如霆如雷爰金甲而拜尊負弩矢而趨

陪使蔡人知上下之分登裴公于上將之臺回思敗朗
山而不憂勝吳房而不摧雪虐風饕地素天皚不幾一
人不翦一材卒能唾手探丸成績而回是日也魏場屯
谿子之衆獨柳待藁街之魁晴旭卷旂常之巔長劔劃
澗汝之洄蔡之人壺士一城皇之人篋膠萬杯皆以手
加額而言曰蒼生待命三十年矣今始見李常侍之來

羅浮蝶賦

借刻黃玉衡

博羅之南羅浮之山合沓迤邐嶽岑嶄崑錦石萃其隈
玉水流其間雲葉振其衣螺翠結其鬟爰有仙闕飛宇
瑤局瓊窟赤花如日碧花如月靈嫗花胚柔植花骨是

生異胥惟山之厥爾乃非孔非翠非綺非組珠壓玉垂
之腰銀泥金錯之羽六銖鳳子之衣十色鴛雛之杼翦
綵則冰條忽豔濯錦則江波如舞斂立若隻張舉若雙
帶後綺交須前玉縱疊紫脂印重齡粉腔宿露不禁受
風欲降出花兮熒熒入花兮冥冥乍合隊兮童童忽孤
翥兮星星則有羊城麗姬龍戶珠人函以白藤之潔飼
以黃葵之新承以綠瓊之鈎覆以霧綃之巾任因依于
中闔絕慕思于比鄰至若嶺嶠間關飄零阻難悵淮南
之木落怯越北之春寒桂無金而蝨死桐謝鳳而香殘
遂乃纏綿夜脫殼穀朝看棚幪繡幙匝匝雕闌懼嬰倪

之竿木避嬋娟之綺紈弄文采之輝輝觸羅網之漫漫
與羈人而蓬轉共秋女而淚彈然而雄雌一去意感千
里御風而行抱香而止幻罔兩以作身遇雲將而成體
終遁虛于夢中不委蛻于籠底當紅棉之開日值素柰
之發時入桄榔之舊苑過蠓蠓之新埤喜仙衣之乍被
憐錦裳之對施指華首以爲宮劃紫澥以爲池任奮迅
之所如伊誰得而羈之

槃圓孟方賦

以天施地生其益无方爲韻

散館一等三名

伊荀況之譬道言符應之自然既疊矩以重規亦體方
而鏡圓其樞在水遂漸被乎垓埏其解在水遂充溢乎

地天若以爲君者器也以有定準無定而宙合範其全
民者水也以順行入紆行而真宰斡其旋惟槃孟之賦
形固象坤而法乾原夫古皇之制作也先陶旅之搏埴
後雕幾之措施以金爲質而寒暑燥溼不改其節以玉
爲理而圭稜肉好各得其宜品儕于魯壺紀獻珍比于
龍勺雞彝其大用則申盟歃以昭盛典其小用則捧盥
櫛以昭少儀惟此器之抱式必思所以實之乃有人焉
辨端倪于造化管生成于天地知夫圓徑一而周三方
徑一而帀四方者取以立制圓者取以行智日月炳乎
空親上者圓而神并疆畫於野親下者方其義圓顛方

趾各受中以全生圓冠方屨亦取物而爲類惟遇器而
尙象斯規爲而不易且夫水之爲物也地六以成天一
以生方以擴其流圓以劑其平其圓也以鯢淵麋澤爲
槃而輪旋穀轉盡其勢其方也以壺口龍門爲孟而矩
句磬折滙其盈是則水本具方圓之性而不擇鉅細以
俱程故觀其井華始溢汲綆初垂滿還益爾情則瀏其
去弧弜與和較正逆防與華離抵玉于山而流還方記
沈珠于淵而源向圓隨旣不決于西東乃咸遂其經畫
或捧器而盪清亦挈瓶而傾白方以比行旣如璋而如
圭圓以觀德亦如琮而如璧彼宥坐者取諸敲而盈缶

者利用益昔者湯聖日躋則文其辭武成踐阼則垂乃
謨惟沐浴于醴粹斯福應而咎无民之歸也如激箭之
躍金壺民之止也若流丸之抵甌與故能渾鑿柄于環
橐握大中于斗樞惟上之行旣隲曲而括正斯下之應
若獻爵而酬觚我

皇上理符心架道協謨觴仰

聖政之彌隆知

聖學之日光登斯民于軌則咸歸極于康莊時圓而圓
時方而方夫乃知不器者道之體從善者性之常將比
戶而可封亦表其受範之良而已也

河出榮光賦 以題為韻 借刻趙光祿

陶唐氏天珍在握地脈通和有龍銜甲有鳳巢阿當丹
陵之紀瑞正黃水之盈科引度懷陰潤物被無涯之澤
求年進福導川賡有黯之歌布青幕于三壇雲將展敬
湛朱絲之二鼓海若恬波豸帳初臨盼龍門之截薛彤
車未渡望砥柱以嵯峩翠氣摩天已送如萍之日金塵
糝地全收如帶之河依然紉縵之華昭昭旦復遠矣淵
涓之勢浩浩星羅爾其色煥五章氣成三霽揚舩未極
蕭索輪困弭節而歸溯法沕滴赤螭跋舞餐餘建木之
霞蒼兕沉浮呼出搏桑之日佇想珠宮貝闕幻瀛女以

成樓依稀翠葆金支逐馮夷而鼓瑟受芝泥與玉牘綠
圖輝委宛之編沈元貉與黃狐丹采耀支祁之室淄盤
九曲藏寶霧於句陳瓴建三門散靈氛于太乙夾岸折
琉璃之幢壺口濤回連峯浮菡萏之花華山掌出其源
也索昆侖于雪嶺考積石于金城賀卜比星辰之燦巴
顏揭日月而行阿拉坦有黃金之號噶達素有北極之
名指白海以如瓜望氣者徑三百里觀紫山而似玦占
休者度一千程彼泐澤之重源潛流電激及于闐之二
派積潦沙鳴由蔥嶺以抵牢蘭之海自驪軒而至鄯善
之營考屯田于元鳳年間功成灌溉稽古瀆于白龍堆

外力任縱橫惟觀瀾之有術斯遇聖而先清訪天瓢之
舊脈紀帝室之新榮其委也南鬲津而改陸北徒駭而
乘漳一綫注胎簪之派屢遷非碣石之陽獻策已踰乎
賈讓程助遠邁乎許商息竹箭于淇園有雲敷碧靜桃
花于瓠子無漲飛黃集福宣房旣鱗恬而鳥沐明禋斗
野更玉美而芟長觀夕照于青徐無邊脫筭望春風于
淮海不盡飛糧旣安流而順軌旋建祉而臚祥或徽徽
而溢日或爛爛而浮光接尾銀潢奪天孫之錦段歸墟
碧海混鼇伯之珠芒於是澄寶鏡而源真治金隄而委
具無設關沈鎖之防有挽索連檣之務西涵濛汜登壇

受亥旣之珍東塞嶠鏡擊汰入庚靈之渡

聖天子紘蓋修虔元圭錫祚禹甸澄清堯雲布濩抗八
眉而論德松梁騰赤岸之雯逢五老以呈圖棗野煥丹
霄之霧奠息壤之田疇罷吾山之草樹如川

帝壽願呈光被之書若礪侯封還獻河平之賦

一官一集賦

以詩名官職看雙好爲韻
借刻趙光祿

簡穆之裔人工屬詞養也早慧颺於上墀景倩似矣仲
宣期之爰有勺約之賦閣齋之詩縟蠟鳳之舊采訂雌
霓之新知起家郎署厯官度支霞上天而光赭珠出浦
而華滋步雲除而緩緩編蘭檢以遲遲普通大通之間

海寓甯清選樓飛蓋元圃吹笙擢爲先馬之職聿著雕
龍之名東陽沈侯南鄰劉生悅輦共繡鐙琰同聲旣遷
中書乃別昭明螭頭清秘鳳尾縱橫青鏤選管紫荷接
纓上觚稜而端牘入瑣闥而飛英依烏列屋銓曹一官
玉山朗澈水鏡高寒宵營虎爪晝領鵷翰庶子風流實
采華殫佐史寅恭墨綰銅刻裁成錦段脫盡金丸臨海
非遙一麾往觀餐雲玉峴之表行藥櫓溪之干烏歸林
而避影泉觸石而妨冠括蒼以南赤城以北吟老花紅
題多蘚黑人誦長官之詩身忘司牧之職旣登少府來
歸王國尙書之臺地官是飭鈎稽水衡蓋藏庾億亦有

高吟不遑退食昔插羽於淵蛸實雕蟲而篆刻今曳履
於層霄更傾壺而灑墨斯人也使其沈淪草澤落冥林
巒悅志嵩少遊心涓磻一詠一觴一樵一竿則將連章
綴莖累帙紉蘭或襲烏衣之世蔭極蟬冕於台端九遷
而至八翼而搏年未荀羨品踰謝安茂豐功於彝鼎收
盛名於琅玕則將汗牛腰而鬥富指麟角以同看然而
時艱者意雙遇蹇者心降似鮎魚之上竹比螻螿之緣
椿旣含香而粉署還染翰於松窗效蓬心於蒼邱剪棠
雨於朱幢祇今寂寂春山沈沈暮江賸斯文之百卷撫
愁緒而盈腔舉生涯之瑣尾付韻語之瑋琰金貂兩兩

牙管雙雙愴神詞鬱望遠眸眺豈欲耀才於東觀報最
于南邦哉故觀其紀集以官由齟逮老起武皇之天監
終簡文之大珣中間簪笏升沈衣裳顛倒鹿去蕉空鴻
歸葉掃出不過文翁治郡入不過孔光削草泛宦海之
鷗波炫文林之鳳藻風愈轉而愈高花再榮而再槁其
集伊珍其官肆好後有作者感其遇而思其人誦其文
而憐其抱可也

美人香草賦

以託物起興志潔行芳爲韻
借刻趙光祿

泛楚水之沅沅度湘花之漠漠葉鄂渚而秋飛雁衡陽
而暝落斯時瑤瑟雙停荷舟兩泊雲外靈修山中杜若

怨王孫之未歸時不待兮隕穉惠嬋娟之旨來野萋萋
而何託乃有人焉飄搖彷彿揄長縠與蜚織耀諸于與
繡裾擬西尋夫宓妃怯洧盤之淠波將南從夫有娥悵
玉筐之未拂彼緡綸之二姚又理弱而辭詘徂清夜兮
迢遙抱幽懷兮沈苑羌無意于蹇修聊寄情于庶物則
有紫蕙丹蓀青籬白芷漚鬱淑郁紛溶綺靡紅壁沙版
之間翠翹曲瓊之底搏之爲枕函結之爲珮藥或葺葢
於清波或紉裳於中沚呼龍象而耕烟喜芝田之脈起
衣仁染而三年履才霑而十里若乃時及熙春霏英未
定綿羽在樹晴絲橫徑裊重露以拖藍醮柔烟而弄靛

來此豸之吳姪召嬈娟之楚媵柳梭含黛之眉梅貼勻
黃之頰水靜妝明風多步凝逐蝶緣隄尋釵俯磴貽椒
申視爾之思贈勺動將離之興羣宜笑而含睇藉芳菲
以通志思連臂以踏春願回車而拾翠何谷一叢何人
一穗葉葉緘情花花締媚疑金鼻之抱熏似么鳳之騫
翅常依垂燕之髻永襲驚鸞之帔及其微霜旣零野燎
初蕪匪艾匪蕭誰采誰擷逐秋蒂之翻風共孤蓬之卷
雪見暮雀之戕莖任寒蛩之齧節偏近紅閨還依繡閣
朝憐黎靨之稀夕覺脂山之缺鬢冉冉而懸絲粉星星
而減潔忽漫登樓相將掩鏡金鬢苔生銀除水迸彼綠

轉而黃回懼芝蘭之改性此袖薄而天寒卻明珠之致
聘倚修竹而言愁指長松而比行空流盼於蘅蕪憶當
年之華盛君子觀於棲枯集苑之趣爭妍競寵之場將
棄蕉萃以招姬姜將進蘼蕪以退蛇牀收百和而盈室
畫雙蛾而鬥長託芙蓉以爲媒恐鵲鳩之不芳昔三閭
之賦詩心容與而相羊過氛氲兮上馳抱明月兮何嘗
折芳馨兮遺所思望美人兮天一方

應

制元夕觀燈賦

并序

皇上御寓之三年乘震執規以順陽和大舉禮樂之盛

儀凡所以聯上下之意協臣民之慶莫不賅備而元夕設燈樹陳百戲焜燿於

禁禦得與觀者尤所榮幸

小臣

橐筆侍從銜

恩飲膏日浹月深茲復趨陪於圭組金紫之采延頸跂踵快心眙目沃穆歡咳不知所云承

命授簡用賦斯事小文末學無以闡述惟就賓主問答之辭以張中外同樂隆平邛治之景象云爾謹拜手稽

首賦曰

擊壤老人曝榮而嬰撫塵而遊方春令節上元將娛乎駢坐之肆與冠蓋之州觀金支之華秀覽百戲之夥够

迺敏於青藜丈人曰恭聞

聖天子牟盧六合徵召五躋

新政新命照灼丹辰兵銷穀殖海鏡河軌民氣衍衍萬方送喜於時青陽告辰鶴雲東行萃九寓之樂思以諧乎陽伯大謠之樂聲東市有銀花之樹西市有金羊之鐙南市有攢星之樓北市有結綺之棚火戲電礮飛爆雷鷹拖鈎拔河等幢走繩魚龍曼延雲霞蔚蒸爾乃明月照夜助以白雪士女炫服錦車鑿籟燦爛琳圃出入金穴鬣鬢黃髮踏歌弭節跡才踵乎閭卷心又馳乎觀闕聞竹肉而竟逐選燭龍而中輟晶爻木其遞耀鑿秋

毫而未徹故夫周處風土之記宗懍歲時之書綵山珠
幕之麗芳苾蒲桃之殊莫不窮瑰瑋之極形通數宵而
畢臚子大夫照書之暇盍往觀乎青藜丈人乃盱衡而
荅曰上元然鐙權輿於太乙神祠僕相羊於叶蟄倉果
掩層霄而上之嘗以上元之夕獨涉乎石渠天祿見長
樂之繁富殊人世之軌躅子徒眴轉於銅駝金市而未
攀躋夫馭娑宣曲也方今

聖天子坐乎璇題玉英之宮召翼宿使舉樂驅鶉噉而
命黎融盛羽衛之上儀聚五色而宣八風陽景西匿光
在鐙樹彩游表道繡厨雲布擊場空寬橫以桂桓於是

三河健兒脈勇氣怡嗔拳卞戲觚頂交頤乳鬢鬥酣威
鬻老罷秋千高踞竝歌齊俯人方角技彼且笑語樂聲
唼囉來自朱波佞童冶謠作態媵嬰印度二入繡襦持
斧同工異曲俱解羽舞劉吃施努俛翻反據兩兩拍張
連臂若狙立駿馬於明駝效解數而跳跟走巨綆而燕
輕試木熙而上翔紛字舞之陸離排絳紗而耀光班文
鴛以相顧列翡翠而重行爰乃暮靄彌望圓蟾欲湧列
炬娛夕枿櫨峻聳棍匝以方圓藏頃刻之奇花昂龍
首以領珠散雉尾而成霞神絲千純芝蓋九葩粹芙蓉
於掌中倒珊瑚而槎枒或粲粲若飛星或熠熠若金蛇

或纍纍若編珠或零零若翦紗或穆穆若落英或傑傑
若繫瓜或闕戶而下虹或貫月而成槎絲管并舉細音
穆羽閒以鹽散節以鍾呂火鳳來下頰蚪對處旣薈萃
而成劇倏驚人以風雨列缺迅走如矢脫絃萬雷動地
萬鏡飛天萬燧繞林萬燭照田赤埃之氣蒸於赤泉黝
黝沈沈鬱爲祥烟乃復珍臺別館華炬載更

法駕移蹕丹天炳明旣膏瀾翻蜃液激清惟上穹之需
雲隨所遇而象呈若僕所言十分而未得其一端目可
治而口不能名也且夫有淳耀惇大之德以出納夫火
政而節宣其赫曦於是乎無灾燁之虞得改燧之宜陳
火戲之義蓋在斯也我

國家曷宇開拓伊古無偶於是乎具羌歌與蠻舞提鷄
婁而曳鳳首示甌脫之雁臣俾奔走而恐後我

國家大武三會人習擊刺於是乎寓兵機於蹙鞠程勇
力而相試嘆干城之足用美綺帛而寵賜又况豐年穰
穰紅粟盈倉

天子儉德素風捐珠犀而抵琳琅惟欲治

文母之歡心乃怡豫而愷康澤四海以蓼蕭錫臣鄰以
篚筐於是乎值傳柑之嘉時進靄扑於臨光也青藜丈
人陳說未畢擊壤老人乃翹首而頌曰侯其禕哉當堯

舜之時日月光華星辰爛陳糾縵卿雲或或闕闕持以
喻

禁苑之景光與不夜之良辰洵異代而同春也夸於市
人異見異聞相與婆娑乎九衢不知東方之既昕

山梔花圖賦

恩福堂師園中梔子花夏曠未放經秋涉冬花
盛繁師有句命澤同作因賦

雪娵娵兮六出蘆薷支掩其媻兮於山之隅其心孔齡
兮其房則孤苑兮斂兮夏冉冉兮兩渠歉兮長願頷兮
觸兮皚兮蕊瑤璫兮秋增枚兮冬茂荻兮唯有美之當

階與衆卉而異芬塊獨得其清逸兮通苑伽之遠聞犯
嚴威而弗瘵傷兮豈恃幕帟之輪囷樹本旣其厚兮雖
欲僚而彌新諒不棄遺於君子兮惜堂堂之芳晨際搖
落而采擇兮懼稔醜之就湮亂曰心同而面殊兮知臭
味之無差池詠風露而未央兮將貽夫子所思

程侍郎遺集初編卷二

詩

橡繭十詠 並序

黔郡州十三富郡二曰黎平曰遵義黎平以木遵
 義以繭繭不以桑以橡然非矧於遵義人也乾隆
 間守陳君實教之於是食繭利凡數十年春秋繭
 成歌舞祠陳君如生道光三年冬澤試遵義旋過
 橡林間風策策然葉鱗鱗然記所歷郡皆有橡不
 以繭今過平越都勻土益沃宜橡因嘆曰處處有
 橡處處可繭也富獨遵義乎過鎮遠見方伯吳荷

屋先生廉訪宋仁圃先生頒令甲勸民種橡詞懇懇著街亭時夕陽爛如駐馬讀之過思南選校官某鞞劄出則方伯廉訪督使巡上下游購橡子教播種期三年成食繭利嗟乎居尊官親民為謀百世利思深哉可謂君子儒矣黔土瘠黔民勞勞無所獲遂積廢不自振曉之曰利在某不信視某地民遽然顧牆角畦稜有美蔭皆金錢其黠者慮利與害俱且權之曉之曰有百世利無一日稅也則又慮購繭器織具紛然貲未入先貸曉之曰如購種法皆官為夫民驕子弟也官慈父母也驕乃惰

慈乃周以周起惰惰乃勉皆可學而能也數歲利必若遵義富甲西南維矣澤職在文字詠歌之可乎分題十各繫四十言附長篇一則舊冬作也道光四年秋九月上澣貴州督學使者程恩澤撰種樹

橡隨在可植三年枝葉蔚可飼蠶飼後休一年老則充薪炭新肄出仍飼蠶

種樹三年成三年莫嫌遲今日一九泥它日千絢絲將絲比薪炭何啻萬倍為黃金在枝頭巧者能取之

窖繭

以綫貫秋繭。懸密室。溫以火。蛾出。配乃孕。不斷
火子易出。

窠繭如窠花。蛹臥小天裏。不知春風來。但覺臥欲起。雄
雌皆蛾眉。生子眇難視。一朝能上高。萬緒從此始。

春放蠶

子既出。承以椽枝葉於筐。能自上。卽取枝葉縛
之樹。

越孃急蠶食。意欲親乳哺。黔孃忘蠶功。一任飽風露。得
繭大於舊。不顧越孃妒。回頭笑嬾婦。歌舞博紉素。

秋放蠶

春繭就暖。蛾自出。配乃孕。以絲兩頭繫兩蛾。亘
椽樹間。卽育子著枝葉。

秋蛾似胡蝶。置之高樹巔。一繩繫兩雌。其情不相連。出
殼葉漠漠。裊絲頭娟娟。當其未成時。晝夜防未然。

毆蠹

害蠹者。鳥也。蝨也。春秋之晝。須毆鳥。秋夜須毆
蝨。野蠹先於柘館。故古有爲蠹毆雀之官。

鳥曰予。口甘。豈惜人之寒。鳥栖蝨。又來。蠹乎。良獨難畏。
響毆以柘。避形毆以竿。持謝鳥與蝨。竝生天地間。

移枝

和作良道集 卷二 三
葉盡蠶未飽。翦枝移之它。毋驚蠶。

葉葉做如絡。蠶蠶饑不禁。翦枝縛它枝。移家綠雲深。聲若驟雨來。蕭蕭風一林。蠶孃未入山。常懷已饑心。

煮繭

繭成投熱湯。入苧灰汁乃熟。乃纒之。蛹不能生也。或曰蛹混沌無知。故昔人無採蛹法。

功成赴湯火。幸在混沌時。繭剛可使柔。絲斷難重治。水凍渥以灰。古法存於斯。齊紈不十年。越羅風淒其。

上機

絲值蕤繭。綢值倍絲。功成矣。如績學然。

絲值蕤繭。值織成金滿屋。燈火連晨星。伊軋擾夜讀。上充公姥禱。下翦兒女服。衣郎郎不著。願換來春穀。

利無筭

橡可衣可食。地寶也。

橡粉可療饑。橡斗可染皂。老枝薪且炭。新肄復蠶飽。一物備衣食。地乃不愛寶。黔富甲天下。居者殊艸艸。

永不稅

民趨利避害。永不稅。乃可與圖始。

購種與教織。瑣瑣皆官費。焉忍復征權。如父謀其兒。有衣耀寒暑。有金充棟楣。土沃民轉勞。民勞勞則思。

橡繭歌

遵義野蠶成繭。曰青桐繭。不知於古為何樹也。癸未仲冬行部。過長林間。葉焦繭割矣。掇其實。知為櫟斗。櫟斗之子名橡。孫炎云。櫟似檇。按櫟與檇迥別。不得以爾。雅之檇。繭當之。因字曰橡。繭作橡繭歌。

冬十一月來播州。撲頭黃葉風颼颼。是何嘉卉繁且稠。云此可媿桑之柔。美蔭捲綠春油油。彌山彌澤彌甌窰。不煩山奴玉斧修。無事紅女青挂鉤。葉以為箔枝為櫛。結茆承種懸曲樛。蠕蠕子子紛相蹂。天教寢食得自由。

自起自眠登樹頭。暝日出曝雨則儻。蝕厥新甲棄厥盾。神叢打鼓小姑求。宛窳夫人跪樹歐。願生脂鳳無生鳩。為毆花豹毆栗鵠。竹柝行晝宵乃休。何如彩幡長其旂。娟娟風露春復秋。兩番割繭十倍收。繭熟圓如金彈投。蛾飛大與胡蝶侔。杼聲萬家絲萬抽。蠶孃樂逸機孃愁。
蠶功逸 絲功勞 流黃縑素充畫樓。可憐龍馬不上鞦。蠶與馬同宮 蠶盛則 馬其地乃封千戶侯。我來長林采其劉。知是櫟斗其實。少其地乃封千戶侯。我來長林采其劉。知是櫟斗其實。

牛卻顧材木翻包羞。黔中土瘠民臞腠。何不廣植上下游。計其贏羨裨先疇。終歲乃無旱澇憂。有暍其道夏暘。

廖有依其士絲衣紉積銖銖寸成長裘衣被直徧西南

北湖懷古

松桂林中讀書影忽乘天風北度嶺居郴乃見月三

聞道猿猱淚如綆謂陽山之民李伯康至呼以博張公子來

擁其頸北湖空闊雲破碎十萬秋荷覆春荇可憐壯齒

三十八照見平生已癯瘠時時縱酒助談謔往往篇章

出俄頃不知貶斥塞衢路謂王伾王叔文輩但覺又魚滿笭箵

伾文委瑣不足計夢得將至連州境欲向同僚告目見

颶風掀屋蠱聚皿夢得之貶連州必過郴時公在郴小欲以目見告夢得故永貞行云云

人竊柄此當議大賢被逐何其猛豈真劉柳語有洩故

遣伾文怒加眚公之貶陽山或以為議伾文之奸而是劉柳洩其語於伾文故怒而加貶

時朝宰半庸妄誰謂先生骨獨饒劉顛柳仆愧公直公

以直譴公則幸長懷柳侯赴資邵時子厚貶邵州詎料劉郎過

蘇井論宮市與論苛斂當時外議殊不省公貶陽山或以為論宮市

耿耿彼婉變者奮箕口使臺中評不得逞不獨李實苦

相厄更遭使家抑不請公赦歸猶待命於郴者使家抑之也憑愚大笑居

士木乞雨來瞻女郎靚有山奇變水清瀉無乃天公界

以靜豈知它日更遠適瘴海昏昏一舟梗祇今湖水半

枯涸湖當郴之北門外遺窾猶傳在便屏侍郎窾在今

孔道旁今化為田便屏葬曰惜無專祠踞湖上我來眺古歲在丙炎風吹人不

可耐快俯深澗酌秋冷曾侯指我已瀦匯時曾刺史銍

水引泉築竝駕茆龍植桃杏公神如水無不在想見波

專祠其上瀾與公永休談二佛九僊地恐公聞之駕以騁

湘中兩番雪歌 乙酉臘作

前日送客湘江頭大窗西臨水陸洲嶽麓之雲浩然起

混茫東去一千里中有急雪萬銀鏃一一射入碧波底

斯時曉色青朦朧紅泥寺邊煙樹紅綵旗遙遙逐行客

歸鞍載得十雙璧昨宵寐中聞雨聲瓦溝歷亂跳珠鳴

明鏡生暈鑪燄短漸覺寒柝蹒跚行北風撼園園折竹

曉來晴絮覆華屋瘦桐小石無奇態我欲衝寒訪湘曲

短衰雙漿噤不發銅斗漁郎唱江淥年來戒飲無酒夢

卻喜墨池激不凍肥羔烹後啜雪茶陶黨無妨一筵共

荒齋土銚註爾雅錦閣貂襜醉文鳳人生何地不能樂

况乃千林散花松側聞西陞雪封山又聞黃河冰塞關

津吏搴菱幾時歇將軍懸甲猶未還老農既歡土膏沃

安得新晴遣春晝隆蓂鼓中春可憐階前已拆紅梅皴

次嚴麗生同年見贈元韻

楚甸風生軫春城斗轉杓青冥來一鶴丹桂舊同僚學

揜紛綸井文包邃雅姚霜天五劍立月曙九霞燒異夢
通輸廖前身倚太霄長楊空百賦矮屋困三條冒擲封

侯筆翻吹乞食簫干戈淹蜀碧君旅蜀久曾見教匪之變風雨傲秦

貂易借將軍馬難求博士軺君平甘隱肆高朕許聯鑣

君曾在蜀中主講顧我餐岷芋無緣識孟椒占星當有邵焚硯

未逢苗予使蜀時與君未相遇倏爾搏沙聚欣然奉檄招鹽車惜

騏驥瓦注辱盧梟玉骨嶙峋蠹仙髯颯爽飄蓋傾無待

熟盞煖卽相邀話到夔門峻重懷石棧遙余入蜀出蜀皆由雲棧未

經三峽故從君問夔門之勝登堂拜尊宿時廉訪公就養驚代讀風謠首遇

揚雲俯情隨伯雪消清奇偏嫵媚高介轉和調游獵談

因管崑崙墮爲超承明棄嚴助葉縣得王喬下走儕幽

介中年感舊要卷書頻旅館聽鼓儼僧寮客厭雙弓米

親馨數斗焦黔湘慚刻楮寒暑倦乘躋遂枉珠璣餉如

看虎豹跳氣吞雲澤月聲帶海門潮君丹徒人欲覓彈冠友

先尋拔俗標引商難荅和珥柱歎微么

訂交詩贈鄧湘皋同年學博

同譜偶然耳對面不相識神交共千里何況几席側早

春造我闡秀眸映火色警詞接輓語握手出胸膈詩名

三十載山海溢殘墨傾倒公諸侯操卷面向北如何賦

窮鳥屢鍛垂天翼古有通榜法原以網奇特使君不奏

牘寸管孰華國誰知高蹈心兼不受吏職苟有田可墾
亦弗苜蓿食我聞師儒官以道以賢得士乃天下本學
用三代式此地里屈宋豈乏走籍湜徒以利祿誘詩禮
亦作賊壇字倘能闢來者踵相陟我呼我友助俯仰愧
所植我友昌於道其道去華飾詩文道之餘實具龍象
力文得歐蘇正詩欲杜韓逼萬卷紛在眼萬卷付銷蝕
何必擬前古要自道悃悃我意從同同三歎轉默默我
別我友後院鎖不踰闕心知四山外花鳥紅組織我得
我母書慈體康且直幸賴韓康藥共戴陽慶德且念遊
子出家人易惶惑頻款北堂曲告以頤養則傾蓋如白

首此事已堪勒矧更隆我母此意尤悱惻我將盥夫子
海枯石以泐讀君詩若書仰屋三歎息我步嚴子韻投
足畏荆棘君乃步我韻雲棧失其仄豈免過情譽恐是
相親亟會否過嚴子風雨一鐙黑會否話行客行客正
遙憶同心而離居後會宜愛嗇愛嗇君子交毋使流俗
測

題湘皋哲兄雲渠茂才聽雨山房圖

有季有季阻京雒欲往從之足力弱鐙昏夜闌耿不寐
何當風苦雨又虐一家氤氳尙岑寂旅人傍徨何所託
遙知客去酒尊冷獨立空階數寒柝季抱雄心未甘老

思排青雲奮長鏢公車不錄趙元叔虛想承明備著作
州縣之役徒勞耳不圖人縛適自縛何如歸來翦明燭
臥誦新詩起行藥百年奄忽有時盡畱此白首相盤錯
箕冠欄具不復御收束黃鍾入趙鐸賤貧尙恃支離篋
富貴先愁紇干雀圖成寄季涕橫下季曰進止仲引卻
引卻季進豈仲願不能肥季使季削誰知季心遠相印
已揣仲志守且恪深憎軾轍隔雲水久慕沮溺耕荒莫
款門忽到天涯季一笑西疇未渝約長牀大被枕資眠
昨夜雨聲殊不惡

張蓉裳學博三分水二分竹一分屋圖

蓉裳名家架貧無立錐焉得此屋蓋畫其意所
欲也

洞庭之水吞具區瀟湘之竹天下無牽船岸上卽爲屋
安用綠窗朱戶誇妍都我來小舞揚其袿但覺偏抑瓜
牛廬鬚盆作池砌種竹何日一碧雲模餽湖南提學
署極小頗
思長沙地清絕應有天上員莊居長沙省中
竟無佳宅泮宮先生

古林逋宅不枕嶽當襟湖豈知身外無一壺虛想水竹
斜川蘇彈琴攬深醪則愉唸詩肩聳口則呿巖壑不置
謝幼輿乃使闌干苜蓿連庭蕪我欲謀之郡大夫爲築
回軒容釣徒資邵之際多林於問有安樂行窩乎時蓉
裳任

新化教諭 小園深裏匿巾翠明鏡曲照離樓梧詩成琴罷酒

百觚風月與客爭清癯何時眼前突兀見此屋再繪宏

景移家圖否乃往叩浯溪吾寥天一鶴猶可呼一鶴謂湘皋也

時僕與湘皋有卜居浯溪之想

綠蘿巖 丁亥春日作

玉人曉臨鏡綰作墮馬髻自顧一嫣然光照姊與姊名
流醉敲帽衣角飄風前書味益胸中俯仰皆可憐茲山
勝以態千古向人拜不假草樹色濃秀發天黛回颺叩
其腹其響若鐘鼓其腹疑有月夜夜白如許桃花日暮
天祇愁化流煙安得棹漁舟守山長不眠

桃源詩

避秦入洞壑世世長子孫如何唐畫詩競指仙之人避
秦卽避宋淵明寓言耳如何武陵客日尋壻口水或謂
錯築城投畚鍤者流或謂瞿拾棋曾與仙子遊漁父無
姓氏實以黃道真劉歆非晉人子驥豈前身持以問淵
明不足當一呷高臥北窗下請從羲皇說河湫至夸望
處處神仙家三度過洞戶今年逢桃花桃花爛若錦北
風猛如虎一飯不可畱耿耿憶前古

桃源偶作

調朱注黛寫煙鬢濃淚渲成石上斑亦有形同吳寸趾

可憐愁煞豆青山

玉源三豔倚丹霞。賺得純郎啖落花。幸有南軒玉簫在。不教陳跡拾胡麻。

栗里柴桑豈足耕。翻然欲作洞天行。僞書不顧淵明唾。太守漁郎補姓名。

陶公不似謝公顛。遮莫來尋洞口煙。一掬桃花兩番雨。永初而後太元前。

澹巖

左揖元道州。右揖柳柳侯。茲巖者不得兩先生姓字。畱得無草木含泣。泉石羞兩先生者。不得茲巖遊。得無神

物闕惜慳其求。茈茈二詩老山谷。引出千詩鑿山綠。我尋黃九到石屋。雙戶呀然差遞而折旋。如入暗室薶蒼煙。忽規天光大其圓。若啟巨壑側以懸。人自壑中窺見天。壑口齒齒藤薜牽。亦有鳥道容攀緣。壑坐臥人百數千。迤其北西幽且偏。其勢總與天光聯。磊磊落落方圓反。正凸凹百石友。各帶詩痕刻星斗。但能飲墨便嫵媚。況乃苔青蘚赤風駁雨蝕朽。可憐嘉祐迄今日。蕪絕前賢在深黝。或者沒字碑中雜元柳。後檢不得遂謂兩先生文未會有。是時春雲鬱沈沈。老龍抱珠潛太陰。卻覘黑暗有若泉。迸出深窅蟄雷雷亦爲之暗。冷飈襲衣毛

髮直。輒土承履。肌肉活。當年曾宿避秦客。客去乃爲二
蟒宅。蟒亦仙。仙不畱。蛇吁嗟乎。人在壑中若醯雞。詩在
石上如鴻泥。興來撞石空谷自響。苔十萬軍聲。鳴鼓擊
何人結。尸託幽邃。道是嚴晨暄燠。盛夏舍清淒。散仙有
福啖鍾乳。旅客亦愛騎青霓。昨宵欲來雨未決。卻恐馴
狐笑人拙。瀟水淡淡橫古愁。中有照見元侯柳侯一輪
月。

浯溪詩

絕壁照字江清妍。影落波底字寫天。有臺託之風翩翩。
有尊貯酒當客前。其壁拒客不可顛。卻負曲徑能折旋。

不覺攀尊睇沈淵。人影字影蒼茫連。與臺遙對及臺肩。
是日唐亭秀娟娟。萬綠裏之墮江偏。池南招提轟青瑤。
有水襟寺橋則穿。是日浯溪聲潺湲。色若碧玉刻佩璫。
亭寺夾橋高下懸。臺北寺南雙壓邊。中若堂若廡若船。
率聚怪石相牽纏。人在畫屏據几筵。石無定相隨其緣。
左才半之右復全。玲瓏瘦皺殊可憐。樹爲石偏樹以攀。
虎豹挈攫蛟龍蟠。就中壽樟不計年。放雲收雲司其權。
雲染樹綠飛溼棉。石亦透骨莓苔前。古路可踏溪可沿。
繚繞往復心纏絲。有盡藏如無盡焉。乃知林壑規以圓。
面面不同如面然。忘其跬步越陌阡。若鳥在林魚在川。

掩映別有亭三椽。尋其故基仍古先。壁字最著中興鐫。
臺亭溪以玉筍聯。友讓得宅畱紅箋。持正論文出真詮。
此外黃米俱騰騫。此外柳記殊怪祆。此外碎金兼斷璇。
上極絕頂下江壩。一舉手皆可蠟。石無完膚石不愆。
石言若曰何淺淺。卻剔蓬蘘搜螭涎。大有逸字薶蒼煙。
炯如三五離次躔。如蛇螭斷謝蜿蜒。文人好名思久傳。
不計陵谷恒倒顛。百千萬年年以還。賸有幾字畱其堅。
人跡不到疑鬼僊。豈知一一皆前賢。客告余曰盍舍旃。
請就茆厂烹清泉。共話漫郎心志專。羣書當戶石鏡便。
害馬已去世事捐。蕭然雲月同醉眠。况乃道州馨粥饘。
父母何在在我塵。其風如薰道如弦。故宜俎豆常吉蠲。
百世相感我停鞭。華星一珠吟一篇。斟酒祝公公叩舷。
何必故山方買田。但恐巢許囊無錢。

春寒

電光灼冰冰欲熱。疾雷驅下五更雪。奇寒中膚布衾鐵。
馬毛蝟縮馬蹄折。石魚山頭曉風起。漣水波紋蹙成綺。
只道冷雲無好春。誰知開落半山李。行人猶披青鼠裘。
居人擁壚酒新斲。可憐十日不見日。白晝然鐙坐漆室。

洗筆池懷褚中令

宸妃欲閉回心院。英國空謀陛下家。若聽知幾強諫獠。

何須議草上官麻。龍燄豔后貪天醉。鵬臆孤臣感日斜。
雙管東風萬行淚。灑來都作墨池花。

鳥語

短竹卑叢錯雜鳴。曉窗不願睡人驚。但能悅耳斯爲快。
豈料呼春別有情。繡闥渠儂兒女語。畫船風日管弦聲。
若教邂逅陀龍聽。石闕深銜過一生。

望壺頭山有懷伏波將軍

下澤車款段馬春紅。初齊綠初亞。征人臨鏡照水田中。
有壺頭山影圓。壺頭去天才一握。聞道靈蛇大如屋。三
千年來素帕首。想見蒼黎當日哭。秀眉將軍真神人。牀

下不荅梁伯孫名言。誠子反賈禍苒蕙滿載。徒埋冤將
軍徑充嫌。運遠翻以賈胡遭。詬譴將軍主戰不主綏。欲
洗劉武威喪師。當時二耿亦相厄。以後叔庠偏畫奇。吁
嗟乎臨軒已覺將軍老。何況讒言塞直道。英雄莫叩囊
底智。百戰終當付秋草。將軍稔謀豈不知羞。逐少游游
閒兒生不願雲臺畫。功狗死不願淳酒婦人手。病倒疆
場裏。馬革一笑臣心挂南斗。君不見溪州銅柱森峩峩。
異代銘勛宗伏波。梁松柰我昭靈何。

嘲北風

澧州道中作

西北峒雲頑且赧。怒風驅之黑縱橫。包裹億萬石花雪。

欲填洞庭使之平老龍羣飛抗而爭半空使風如使兵
屋瓦亂掀如紙輕屑屑珠玉灑灑墜窗破帷裂連五更
曉來一白山崢嶸餘怒在樹猶長鳴倘一夜力埋谷坑
得不馬仆行人驚呼童埽砌僅寸許不滿力士三茶鑄
乃知蜚廉妄庸耳虛作倒海傾山聲嗚呼虛作倒海傾
山聲孰雄孰雌徒其名

澧州

北枕涔與澹南帶澧若道澧涔澹道四經流名維西亂源匯直絡
復橫繞東則江沱注三派曲相抱孤城面面水浮動兀
一島當其夏秋漲東下海瀨澹洞庭九州大徧吸亦難

飽四水得所向若子趨厥媪豈料江沱至神力龍夭矯
四水能弗鬪遇之竟弱小况值圩堰阻青青馥其稻築
捍各競峻屹屹對厥堡水怒不可洩水徑益以宵一怒
復再怒森然出鱗爪齧隄更齧郭其勢便欲沼莫恃文
良制文良制石為之以分澧漲及我西東棗西東護城隄棗隄皆防四水潰者不與

水爭地何患馮嶠鸞苟與水爭地盪決等振槁城垣儻
不守田禾亦奚保且聞上游寒沙礫挾木草深渠化淺
箕春泥壅秋潦若使下游暢一白湖天曉今夏四水溢
奔赴疾如鳥飄風帥猛雨夜半助其狡隄泐積然缺城
危業欲倒老少相踐踏壯者據木杪倚堞手可盥俯堞

膽先掉咫尺卽溟渤千里一浩渺雷碎大塊碎鯨吐萬
夫撓幸賴使君力不棄一瓠寶止其溺人笑授以黃襪
裸稍稍就安戢一一出流殍萬手指圩堰恨不仆其表
人指天亦怒頃刻大波掃官私圍齊開
水乃得洩六晝夜水退相
與卜平燥當夫昏墊際悔不疏濬早及夫灑澹後晏坐
食新麩所望賢通侯高踞雙目瞭此利彼必害灼見析
豪秒俾城作鐵室治水去毀擣圩堰可決決黎赤仍不
擾陂有兩黃鵠野富六穰導卽看雪霰集林邑便已浩
下走樂無事濡筆紀豐兆詩成九澧側凍日紅杲杲

大風渡澧水滿天雪意

郭外朔風殊跋扈田閒輟水亦春撞寒煙一雨便沈屋
落葉萬鴉同渡江倦骨入冬翻覺健雄心當酒未全降
馬頭莫惜征衫溼看取年豐雪打窗

贈王大令香杜兼呈鄧湘皋學博

銜卹未得歸墨經行且朽色養未能遂盼斷倚閭母勁
風從西至人獸盡東首幅抑孝子心孤館一鐙久孝子
固良吏慎受慎所授不揣污鱗意乃致讒謗口今豈必
直道弗媚衆卽詎况復工爲文世道例獲咎

文章至今日積弱不可強稟賦益以薄風骨何其佺必
有扛鼎力美醜斯可商不乃吹死灰折筮驅跛牂君筆

程氏詩集卷之二
鐵鹿盧八角森鋒銳能續人怒嬉與龍拏鳥鴉先秦兩
漢閒其氣宏且剛上取縱得中不失韓柳行誰謂宛轉
絲能敵百鍊鋼

直竹中箭筈羽鏃益厥殺健筆入無閒萬卷成厥大才
識生於學學生於不懈文始須放縱繼乃戒捷快渾渾
其源來江海一蒂芥上明周孔道下與出處對固恥傍
門戶亦必緹佻怪此事出天性悠悠古今會與子行將
別請俟異日話

東海何洋洋子懷鼉賈才安可便廢置尙有黃金臺名
山多餒魂焚溺蝨魚灰窮達戀薄祿萬一親顏開得志
行吾學百折不可回否上萬言書長嘯歸去來

斯文吾道閒清切惟畏友與若己者處譬鏡寫我醜吾
拜先生筆欲作每箝口吾拜鄧子詩握管輒棘手前有
大敵在角逐慎其衄脂澤哀駘姿冀冑孟媿首子今去
長沙誰濯我背垢急歸招鄧子促席連卯酉各有名譽
心偃仰看南斗

題孝女張淑先籲天煮藥圖

讀破岐黃書不如揣病情父寒父熱女則明投熱毋投
寒女一議出父乃生代死古所難天公愴其旨血疏上
奏女竟死篋有焚餘草草未出時父病已嗚呼使曹娥

聞之得不先迓婆娑神緹縈贖父書僅以春藁聞嗚呼
淑先女叔先雄豈前身

賀湘皋移居

欲將安樂行窩築其柰茆龍葺不新

湘皋寓敝齋屋宇甚陋

造膝

喜當交讓樹窺垣時見一方人

君下榻敝齋相得甚歡又精醫術時與老親診

視炎歎卻掃同局戶風雪移居又買鄰遮莫張羅官署
冷尚嫌熏灼庾公塵

不由旬地接書堂家貨遷來有底忙祇許琴尊環白醉

漫勞車馬識青楊寄貲已自煩裴冕

謂康大中丞假以僦屋貲

賃廡

終須對孟光

明春眷屬同來

料得玉潭新講舍早梅無限待詩

香

歲暮雜感次前韻簡湘皋

眼底茫茫風雨集天涯草草歲華新居州未必工齊語
莊鳥徒勞感越人肯爲分金儕北郭屢因撲棗戒東鄰
年來飲徧沅湘水依舊菜蕪甌滿塵

豈有天花落講堂談經習業爲誰忙曾披椒櫞求芳草
要屏箏琶聽折楊殘客儀形忘謝諶故人風味類思光

謂湘皋

青熒燈火宜相對領略齋廚晝粥香

湘皋以歲暮書感詩見示獎詡過情因疊前韻答

之

齋居見說清於水風雪初闌物候新卅載無瓊堪坐客
連宵聽雨定懷人謂湘泉之兄雲渠君如蔣詡開荒徑我為東

坡署德鄰坡公有德有鄰堂試杜席門欹瓦枕喧喧多少馬蹄

塵

問奇載酒叩書堂信有磨人子墨忙盡道有才過屈宋

劇憐競爽得王楊謂礪東萬金良藥蘇沈痼一割鉛刀愧

步光我自蕭齋拜詩佛夜寒親試玉麝香

詠史仍疊前韻

粟轉梯山連歲腐蝨生甲冑幾回新定知額額稱飛將

不是恂恂一鄙人爰劔竄身翻蔽炎涿鞮突網轉驕鄰

若教狐兔輕鷹犬誰掃輪臺徼外塵

出奇休恃陣堂堂銀鵲虛奔底事忙未見兩髀皆脫肉

卻疑左肘屢生楊老謀已竭哥舒翰將種新除斛律光

料得邗連無雪阻西風萬里戰袍香

湘皋見示移居後連日大雪之作即次其韻

風屑稽灰勢未殫臥聞冰箸墮珊珊舉盃欲共天酣醉

命駕先愁海浩漫人迂王恭初著筆詩踰東野不言寒

誰知妥寵蘇蘭役別有青腰玉女官謂新納姬人也

醉司命日作復用前韻

筒裏錢刀日益殫尚思朋酒恣盤珊黃羊亦是尋常饌

郭禪原非耳目官。信有日明何可燭。不因人熱乃能寒。糟糲抹後朝真去。祇恐風多雪復漫。

雪後嫩晴倒疊前韻

銀蚪掉尾避蒼官。尙作春來數日寒。此土已戕旁不肖。

岳州今歲多蝗此番雪後當無遺種矣

我師猶戍折羅漫老梅姪姪歆香

玉小竹鬚髻綴女珊。欲趁新晴挈游榼。卻愁泥滑馬蘭

殫

追題黃丈東井五老圖應其嗣君支山屬

二老踞亭倚檻話。二老藉苜書作界。坐石一老風骨最

是漢循吏次公輩。朗徹其裏碩厥外。讀書成誦瀉水快

爲政禽賊不用械。不撫所仕塞其兌。歸來息園解冠佩

遂與四皓成古會。花竹蕭灑地幽隘。往往談讌出光怪

二江夏黃侍而介。一進酒一杖而艾

支山侍旁持杖杖頭挂艾

四賓

色怡一主對各有真意。各天籟紛紛偃僂戀冠蓋。鐘鳴

漏盡不知退。聞先生風得無悔。先生父行我所戴。杖而

艾者我所拜。老成典型吁可喟。試看流星入昴內

題闕畫師嵐觀潮圖

字雲山

兩龍伯操繫海練。勢自東走飛入西。萬雷裂雲萬牛吼

聲自地腹穿天臍。况當月皎冬霽。雩浪花白壓銀河。低

喝月月倒行吞月月。無影素車白馬欲到未到際。但覺

橫空一鏡當頭冷清輝直射雪山透怒流曲卷圓珠騁
 其下島岸秋毫見其上星斗動搖頃我會邂逅錢唐潮
 聞道海昌尤怒驕君在海昌觀湖因作是圖歸來仰屋畫不得谷分
 厓畛徒喧囂畫水有聲况畫潮天意特遣張僧繇先生
 笈裏有龕楮八月枚乘拜其下

闕畫師嵐我與我周旋行樂圖

我未晤雲山不知其人視其友圖中畫乾嘉間名流所作我已讀其
 畫即今誰是宋元手我識雲山壯時面火色高頤目如
 電才名世載食無肉聞道龍鍾鬢垂練自照已非當日
 顏彩筆尚蠹金琅玕即今誰是宋元手我與我外殊無

偶

乘迅流賀逆風

乘流快意下風又助其駛曾否窺落溲無亦觸坎止風
 水力一悟雙櫓戛不已三老詛風伯不計上瀨彼上瀨
 爭尺寸帆纜互相倚依然背篙叫手繭足交觚風性至
 無定且暮不可恃水萬折必東吾亦欲東耳好山常俯
 仰倦鳥同臥起况聞報郵籤日已行百里

沈栗仲同年宰鄱縣以弦歌化之邑能鼓雅琴者

四十餘戶其治可想以詩贈之

一夫弦歌千室鳴古有單父東武城三代以還無此聲

此聲能使王侯貞閒暇無事修太平化我鴟梟哺所生
雲秋之水北入泚上有神父秉周禮攬深醴愉萬事理
偶欲登高臨淥水諸生十百希厥旨路人咸詫問所以
指絲桐曰命之矣茆厂夜月彈流泉杼聲書聲相糾纏
稍涉北鄙便自愧何況洙泗斷斷焉邦君憑軒賡古篇
邦人和之如衆僊趣拜炎陵求練弦翦其青牛剉雙角
夔襄薦技班倕鑄君曾取炎陵梓作琴神農大笑投赭鞭此調不
傳數千年恨君不識袁孝尼恨我不識元魯山于爲于
曲已徧誦廣陵妙散胡可慳不成章我亦不怍但欲博
我高堂歡時欲就君學琴進觀君藝何嫵爛能詩畫書奕劔丸

所可測者器數聞不可測者海波瀾廿年同舉今甫面
冰雪同清鐵同鍊愔愔琴德美可眷君山豈受宣平薦
五技都窮臥花縣何當密友羅曲宴三疊胎仙舞深院
座中那有鍾子期祇恐軒駒側冠弁

郴州五蓋山至峻屹其巔有峯益高戴龍湫湫下
坎產石若端溪郴人取而礪不知硯材也刺史
曾君鈺識而寶之以爲勝端溪下巖丁亥秋余
在長沙忽一夕夢造刺史室室盡硯邀賞之遂
懷一去覺而寓書於刺史以爲笑時絕不知有
得硯事也刺史荅書述果得硯故且詫我夢我

亦自詫其臘小除刺史餉硯二啟視之皆夢中
所見也刺史有詩作此奉酬

五蓋齒齒齧霄漢上猶有峯安可窮其峯碑兀戴神漢
云是雷電龍所宮潛源一綫穴南澗靈液饋餽蒸雲紅
雲乾液枯漸可割化作百萬圭璋琮何人欲斲不敢斲
斧鑿落處飛晴虹尺寸偶挂使君眼云此實與端溪同
試琢平坦著子墨其色黝黝花叢叢能飲陳思八斗血
能了潘谷三年春左右驚瞻詫瓌璋使君荷畝親相從
使君能文善隸古以石為友書為農故因華妙聞帝所
冊以即墨諸侯封况復俎豆韓張李得不誠感昌黎公

時正濬北湖建韓文公祠
而以張員外李使君配食報以文玩助文藻濡染柳筆

傾湘東卻怪遲錦與江管無乃夢幻空其空而我以夢
詣君所自堂徂室窺簾櫳畫屏棊几發奇怪是何物者
光熊熊如肌肉活怯指按如煙霧疑愁風攻紫者膩墨
比刮竹青者摧墨儕撥麤一廬之內臥礫砢有似馬磨
環其躬我懷其一拜君去仿佛度嶽聞清鐘覺來挑鐙
索席扈依舊敗瓦欹詩筒乃修魚素博君哂君荅有鹿
藏墮中我欲順途詠其事君乃錦帕雙其蒙繩開匣啟
爛然出與夢所見無殊蹤急剡并華過一斗不暇作字
專磨礧麝香漚鬱衫袖腕一笑殘歲崢嶸終轉憐硯不

入君鑒女以搗練男銛鋒有若偉士遁荒隘頭白志拙
無遭逢卽今走馬望五蓋欲詣君室偏匆匆何妨昔昔
夢爲僕手把椎斫披蒙茸并擬撰銘五千首一一劉徧
仙芙蓉大呼石超爾何在曷亦拜倒會南豐
其顛峯有石超道人
題千雷萬
雷等語

忠孝女沈將軍歌

獻賊殺人若薙草長沙以南無完堡避賊鋒者走且僵
諸統制師皆女郎守備獨以孤軍當
孝女父沈至緒殄賊過半
身乃戕身戕其骨爲賊得孝女哭父淚盡血刀如青霜
馬如雪白甲白旗白袴褶一隊銀龍翻虎穴賊見孝女

疑飛神弓不暇彎矛不謹但覺仆如木偶人多羅棉手
劔鋒利左鋌右鋌恣我意帳中萬賊俱伏地忠臣骨在
孝女肩歸來一慟雲黯天環陴士卒誓死守忠臣屍與
州城全獻賊不敢窺其藩孝女志與州城堅詔褒嬋媛
晉遊府十六芳齡帥貔虎五嶺以外聞其鼓鼓聲忽死
麾不揚天涯熱血埋干將夫亦戰死爲國殤
孝女夫賈萬策夫
逐父去魂洋洋妾感身世何蒼涼脫我綠沈之甲還君
王雞斯徒跣奔故鄉青鐙萬卷聲琅琅殺賊手說經口
宣文女徒環座右花時不作兒女夢夢見彎弧射天狗
滄桑一變無何有只此能忠能孝能節奇女子女雲臺

上三不朽况復文能傳經武戡亂俯盡天下雄才首君
不見明璫繡帔麻灘祠異代猶作勤王思嗚呼孝女何
其奇

書劉母田太宜人事應觀亭司馬之請

太宜人姓田氏雄縣巨族女公子父宦伊涼侍杖履芳
年玉映蘭閨裏孝經內則常在手更尋列女到彤史喜
觀相人書喜覽聿斯經喜繙靈蘭祕典冊喜講司空城
旦刑學成一笑凌青雲百家古有義成君斯時劉大令
正宰古浪縣宓子琴絲忽中斷誰歟來續鴛鴦綫太宜
人歸甫卻扇卽能撫前夫人子如已兒憐其羸弱不可
支趣爲納婦似續斯兒薄祿相孫含飴大令政成殞厥
命官衙鴉散雪霜迸嗟哉太宜人血涕掩鸞鏡以一手
持大厦傾以一手扶旅櫬行提孤孥嬰愁避兵突風吹
到刀槩聲萬賊據險不可爭急卷雪衣投柳營兒羸兒
弱竟以哀毀死可憐兩樗父若子卻顧柴柯尚千里有
姪廷模遭諸途涕交頤下紅模餽姪已遴選不入都願
送阿姆還鄉閭便卜窀穸藏王鳧興吾宗者廷模乎柰
何欲以閒穴出乃搜賻布括珠瑟遂以貲領大尹秩廷
模迎養楚水濱太宜人笑花縣春太宜人歎廷模詢其
諸官事失厥倫太宜人曰爾治爾邑無冤民我歎我親

未邱首我生未履易之阜此生得照易水否到時族黨
知何有阿誰能似聊曼母廷模一朝報最北入京板輿
遂過雄之城太君不識東平塋忽遇田父僂而耕問之
指點說宰樹再拜祠下感霜露父老太息子弟驚乃屬
子弟往迎雙玉棺由都下以窆易干嗚呼田氏有孝女
劉氏有賢母相夫治劇久訓姪治譜守使夫有孫繼厥
後使姪佩印大如斗使親得瘞故山左今紛紛拜太宜
人者皆廷模之友乃問吉嘉問凶醜云能貫穿李常容
包括鳴雌負我正告諸君曰問太宜人當以大節先求
之古豪賢恐無多讓焉

道光辛巳夏秋予兩過東湖高芾堂前輩適守鳳
翔爲東道主丙戌戊子之夏予兩試衡州芾堂
觀察是邦兩招飲於湘蒸之滸撫今追昔匆匆
八年矣賦此志感

東湖之水碧且黝君投其盃石螭吼蒸湘之水弟若兄
君挂其笏紅亭明坡翁一別韓子逐可惜熊魚不雙炙
爾來王佐頌邦君已見文章開講舍不疑自守慈母訓
興祖一任妻孥誅

觀察署中
無眷屬

然夏非夏秋非秋屢以雀

躍從君遊憶昔醉我岐下月鳳凰耳畔鳴啾啾君歸我
臥兩寂寞明日蹠躩周原頭豈料共飲蒸湘流手拂石

鼓維扁舟十日閉置作新婦一朝泮散如風鷗驂驪八
 載幾彈指我驚其面君髯矣各有高堂皆髮白苦無二
 頃供甘旨公侯衮衮君其徒會讀城旦司空書我似鴟
 夸託屬車未免瓠落慙江湖前年酌我紅亭側竹樹團
 團裏筵碧今復期我衡之屏想見九疊環亭青有岳屏
小飲之

招尚未
赴也何時再訪璜溪釣只合出門西向笑璜溪屬
鳳翔

贈譚鐵簫太守

光祐

譚侯貴公子慷慨多大節朱門少年日開口怨離別袖
 中五色管盛夏集冰雪翩翩困科第前輩盡傾折投筆
 未四十才名動

宮闕家門骨肉苦朋友遇合缺舟車竄風雨肝膽變胡
 越仰天吐偉句真氣偃溟渤其來無首尾其去彌盪瀾
 其勁若引滿其曲若蟠屈只畱青蒼色不受脂粉抹藏
 園避其鋒子山拜其律謂吳蘭
雪舍獨於西江社施以杜韓

幟看花席尊酒射虎挾箭筈一篇偶飛出傳誦已嘖嘖
 或招金閨彥或入玉人瑟譽滿侯不怡危坐求古昔公
 卿塞閭巷無路取簪黻竟騎將軍馬殺賊草羽檄功成
 薄受賞踏遍蜀山兀衆水在指掌環混不能溢可書便
 可繪談笑江漢決侯著有四川水
道源流簡明說爾來向南楚美政不
 勝說封侯已遲暮况乃未騰達前席求異才賢喆爭擢

拔得權功乃大詎豔秉麾鉞我昔使益部晤侯摩訶側

忽忽六閱載聞聲每傾結行部見資邵兩江會而激辛巳

秋遇侯於四川試院頃按衙官到屈宋流汗愧且蹶旁

午必劇談露曉與燈夕侯氣清而夸侯論雅以質渾忘

古劔銳但覺大圭潔英雄固名士兒女亦仙佛侯有英雄兒女

圖我懷湖海志共此一腔熱喜聞忠孝語力埽迂懦轍

讀侯卷未盡起舞更叫絕想當歌哭際吹裂六州鐵侯又

有吹簫乞食圖作者不經意聞者輒嗚咽即今好風日花發水

清澈春風貫簫孔山勢屹詩骨茅亭踐蘭約洗耳聽奇

突金石留逸響蛟龍起深窟蒼茫千萬感爛漫二三月

題李海颿太守海上釣鼇圖 丁亥

朔風初繫歸客槎占有大星來軫車乍覲面乃等疇昔

便喚滄洲老龍伯肌髮光細僊之人飲我白湯如飲醇

弁年循政浹淞水能化巨盜作順子何況鄭兒開門孤

所到盡以家公呼情慤德滿意款款溢為文儒白玉管

吐辭淵雅天所發東郭順子人意消曾從絕險造平澹

山嶽壁壘不可撼釣竿撐突天地臍淞東以至蒼梧西

君自浙來永州與任公子淞水以東蒼梧以西之說相應五千之牯一鉤月鼇上不

上山磳硯誰知六六齊點頭蓄以盃水以芥舟才雄志

大類若此眼中詎有任公子

前席晝夜求軼才使君握電驅風雷一日九遷無喜色
一息六月豈太息况復水清山古幽友猗玕子友柳侯
虎符龍節果來逼袖中放出奠柱力何時海上三神山
十丈珊瑚紅一竿希有鳥拂大鵬翮笑倒君家釣鼈客

太白有大鵬
遇希有鳥賦

題陳西侯問津圖三首

問渡從來不繫船誰教越客此停鞭江潭柳色春如許
棖觸名場二十年

賦罷娥隅漫自猜驂騑道路劃然開劇憐驚座通侯氣

元是微雲女壻才

西侯爲吳山
尊先生壻

錦作蓬萊玉作京皤仙指處最分明定知馬穩春山闊
不向青苔仄徑行

山行看花三首

桃花冷雨春濛濛和以溼雲從以風馬蹄汨汨踏泉脈
山翁掩戶笑行客一叢穠李出竹枝玉顏翠袖天人姿
綠章今日達帝所孟婆前日已含怒

山花開落風雨司瓶花開落自主持瓶花無根不可活
山花落盡行復發有開無落花之心不風不雨花不禁
但名爲花總須落請看長松臥深壑

積巖絕巘花因依斷橋僻徑糅素緋不受豪家畫檻貯

和何良道集卷二
不上玉人雙鬢去。如雲如海搖東風。日暮可憐誰與同。
鶯穿蝶抱皆知已。况是攜尊賞落蕊。

辰龍關

我曾徧踏黔蜀山。辰龍卑卑不足歎。祇緣峽立四壁鐵。
天割一綫不可補。萬里風來洒客面。帶滇之雲黔之雨。
沅南羣峯盡縮轂。夸望亂源繞門戶。卽看鐵星陷石臼。
嗟哉逆藩此最怒。頻年自恃雄關閉。豈料閒道通貔虎。
高崖細溪左右出。更抄清捷背張弩。賊進喪膽退失據。
黔滇自此摧螳斧。名山自昔多窟穴。如蜂窠簇如齒齠。
淮陰曾拔井陘幟。武惠亦避劍門阻。傳云在德不在險。

起得傲兀結得
閒冷

天竈凶門誰敢侮。何况辰龍瑣瑣耳。以逆犯順盜憎主。
春山卉木紅連屋。晴日鷓鴣啼到午。馬蹄人影自來去。
前村正打催花鼓。

仙人房仙人劍詩

斧劖壁立窺江傾。上戴棟柱樓梧撐。仙不世居此間營。
自人視之咎管盛。仙或視之華屋盈。了無風雨飄搖驚。
兩崖對拆數榭橫。眠一長劍丹青明。後其臘鋒前其莖。
莖首有眊銳而輕。大匱蠹蠹舟庚庚。旣置家貨復貯兵。
仙人無乃恒人情。當年有路通客行。或石未泐壁則平。
或水勢高凌崢嶸。嶸嶸偶簇朽木得氣。精人則爲之似天成。

向後路斷不可耕空際遂裏煙雲生衝風琅琅木葉鳴
猿猱仰羨鳶若鷗今宵天開月則清其諸彷彿來鶴笙
我欲一假干將擊卻恐吹鼻啞無聲

題鄧子與詩卷應湘皋屬

字逸詩清人磊落蒼茫一幀至今畱能吟誰識連文鳳
感舊偏悲釋貫休子與明遺逸其詩弔詩僧某亦遺老事去劫灰餘冷淚

時來寶月入冥搜先生有志肩文獻無限沈珠待網求

泌溪垂釣圖爲歐陽同年題名佶

佶之父竹庵先生孝養其母母嗜魚因釣以供
饌母歿後惟祭一釣也其喆嗣佶出此圖索詩

五侯之鯖五鼎養不若負米急朝餉魚監之魚取諸官
不若隱君青竹竿素髻旣割薑桂馥老親一笑捫其腹
溪水迴曲溪風妍又送唳聲來耳邊岸巾以晴笠以雨
過者疑巖復疑呂枯魚銜索一朝殂骸跡漸掃落痕蕪
偶因薦新理芳粒旁有季蘭助其泣謂公配何孺人至今溪流
玉潺潺想見道顏清而閒冰下老魚慎勿觸曾飽當日
仁人粟

詠史

劉尚師全覆陳湯老據鞍有書招贊普無劍斬樓蘭
粟談何易懸軍古所難微聞漢恩厚將相已彈冠

大龍驛雙桂軒

我今五渡漸江水，愛此雙桂幽且妍。漸水在三十鋪好花一度未曾見，明月三十七回圓。山僧行腳過萬里，館人白頭已廿年。往來數數殊自愧，忠言奇謀奚在焉。

再題龍陽驛館

寒日未曛曩亭光，已向東煙馳大地。白霜瀟半天，紅帆布支提杪。人家茶把中，欲招圖畫手。破曉坐微風，

橋曲四五折，花增千百羣。使君能領橋過客，正書裙。董大

令阿郎在園讀書綠厚園逾古，茶香鳥共聞。登高知政理，耕織

日紛紛

呂麗堂太守射虎圖

戊子

民奔呼，山有虎。朝暮食三人，一媪一鬻一婦女。民奔呼，太守呻。虎胡為哉，噉我赤子如噉豚。糾我衆，礪我矢。虎來虎來爾必死，虎不負嶠乃走壙。得無政感神所相，虎就誅。殛訴無狀，白羽洞背直達吭。虎魂零星虎膽喪，殺虎如鼠歸來歌。太守之勇于廣何恤，其被齧弔其室。太守之仁與均敵，斯時穉稭黃雲平。腰鎌夜獲無恐驚，害除民樂設社酒。招邀健兒飲一斗，

小谷黃丈善繪事言湘山之綠勝江南因賦此

柔風東來小波舞，夕陽睡起湘之滸。但覺蕉梧繞窗戶，

不道羣山碧如許，近山茸茸如裏煙。遠山楚楚混遠天，
小橋叢薄幽折入，奇石老樹周遭圓。誰歟畫此山嬋娟，
癡黃大呼山來前。廿年夢裏盡蒼翠，要與造物爭天然。
六朝雲氣滿行篋，片片墮入西巖楫。憑將十斛好螺黛，
染取百幅羅裙褶。春歸嫩晴殊可人，米家几研若爲新。
祝君畫取詩中意，消得柳侯一綠字。

題黃小谷畫

楚楚丹黃壓樹鮮，疏疏籬落帶花妍。緯蕭亦有江干屋，
吹破西風已十年。

杏花絕絕柳柔柔，屋角春禽促駕牛。縱不有秋聊自樂，
絕勝辛苦覓封侯。

蒲圻道中

鐵纜雙縻巨艦排，馬蹄浩浩走風雷。蒲山勢到沙羨俯，
修水源從下雋來。萬頃稻肥秋雨缺，三更雞睡大星催。
蒼茫憶古空搔首，不見東吳右部才。

灑湖

距漢口鎮十餘里有湖焉，滙灑水及江支流阻，
塞孔道約四十里許。春夏間非舟不能渡，秋盡
冬來則成坦途矣。

排空萬櫂舞漣漪，無限斑駁脫玉羈。人道秋田恃甘井，

天教夏潦作湯池商量更鑿梁山灤反覆誰歌鴻郟陂

時有廢湖
爲田之說

卻愛遠村開夕照柳行如屋竹如籬

有感

濃朱厚黛損天真况復蹒跚強效顰但倚市門都辦此
何須絕世浣紗人

連宵珠彩貫晴秋月在東南第一樓喫詬離朱皆不得
卻教象罔漫相求

黃陂道中

南司州地才經過平楚蒼然四望陰金氣西來風跋扈
早雲東積火燔燁忍看龜兆干尋圻不乞龍鬢一滴深

我亦鋤犁能把者苦無千頃換黃金

武勝關

昔慕直轅天下險今驅羸馬踏雲來了無磴道千盤峻
但覺回颺萬壑哀淮漢背流收亂水申黃自古鬥雄才
果然談笑能擒賊合向牛醫耐一栢

史

黃叔度擒司馬龍
故事見天祿閣外

西平道中

刺促成何事差池不可齊功名上蔡犬歲月汝南雞種
種憐秋鬢紛紛憫夏畦誰歟佩霜劍淬礪向棠谿

臨潁道中

日暮途岐已自憐，何堪猛雨助憂煎。
潦翻一馬行將斃，風殺雙燈不可然。
羹飯無緣瓢欲棄，衾裯何處榻空懸。
楊朱失路渾如此，忍誦駢夫四牡篇。

潁川書感

漢潁川郡今許州也

潁川黃與太邱陳，怪底精靈感召神。
庭廡時時下鸞鳳，盃盤草草聚星辰。
豈無北舍來鴻雀，亦有東行說異人。
畢竟傳疑卽傳信，薰然明德藹如春。

曉熱

山形入莽蒼，秋旭向昏黃。
露稻通宵重，風荷隔塢香。
心疲成漫爨，語癖漸疏狂。
試問勞勞者，曾思枕簟涼。

過新鄭喜晤家益堂大令

德增

相逢韋杜鶯花曲，爛漫同傾瓊醪盃。
入座樂緣車武起，叩門聲識孟公來。
青山歷歷游如昨，宦海茫茫首重回。
今日驅車尋桔枳，鄭南門也人傳君是惠人才。

由豫入燕日日看太行

自渡金河北，連山盡太行。
鬱雲朝礫砢，團月夜蒼涼。
形勢幽并豫，波濤沁衛漳。
西虹飲東海，千數里而強。

邯鄲懷古

茗花顏色夢中栽，錦瑟銀箏絕可哀。
豈有壽陵能學步，斷無廝養解憐才。
溫明尙記蕭王殿，歌舞難尋主父臺。

祇有宮池舊眉影，夜深還化月鉤來。

索炬歎

一月不雨稻不粒，東疇西疇屛水急。官符夜下鳩丁男，
明日行勝昇貴官。鞭之不起訴非嬾，心逐桔槔輪裏轉。
歸來一飯未安處，忽聞伍伯詬且怒。踏破柴門索蕉炬，

